

tant d'autorité depuis son Baptême, que personne ne luy ose refuser l'obeïffance. Vn ieune homme n'exécutoit pas vn iour assez promptement ce qu'il luy auoit commandé, Hé comment luy dit-il, tu pries, & tu n'obeïs pas. Viens çà que ie te donne trois coups de baston sur le dos. Cettuy-cy s'approche, les reçoit paisiblement & s'en va faire ce qui luy estoit commandé.

Le Pere desirât qu'on portast la brique qu'on auoit amenée pour bastir la maison de Tadouffac, le Capitaine commanda à tout son monde de trauailler. Quelques-vns se chargeans trop, le Pere les en voulut aduertir, & moderer leur ferueur; laisse nous faire, dirent-ils, c'est la pratique de ce que tu nous disois hier lors que tu nous exhortois de faire des mortifications pour nos freres qui ne sont pas baptisez, à l'exemple des François qui en font tant à nostre occasion. Cecy fait voir que les ames [223] des fauages sont capables de la perfection, autant que celles des Europeens. En voicy vne autre marque.

Le Pere Buteux auoit fait vn petit discours de la pureté d'intention qu'il faut auoir en toutes ses actions. Vn iour après il ouït quelques femmes qui s'entretenoient sur ce fuiet, As tu bien retenu, disoit vne, ce qu'on nous disoit hier. Oüy, dit l'autre, mais neantmoins i'ay beu vne fois sans faire le signe de la Croix, & offrir cette action à Dieu. Et moy, dit vne autre, i'estois à demy chemin pour aller querir du bois, lors que ie n'auois pas encore pensé à Dieu. Ie n'ay pas manqué à cela, disoit celle qui auoit fait l'interrogation, mais ie n'ay pas remercié Dieu en retournât du bois, & i'ay encore ioüé aujourd'huy vn peu de temps sans offrir cette action à Dieu.